



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LESIBILI (P2)

INDLOVANA/INDLOVULENKHULU 2018

IMEMORANDAMU

EMAMAKI: 80

Lememorandamu inemakhasi la-24.

TICONDZISO TEKUMAKA

1. Nangabe umhlolwa aphendvule imibuto lengetulu kwaleyo lelindzelekile, maka timphendvulo letisekucaleni kuphela. **(Umhlolwa akumelanga aphendvule indzabambhalo kanye nemibuto lemifisha encwadzini yinye.)**
2. ESIGABENI A, nangabe umhlolwa aphendvule ngato tonkhe totine tinkondlo (Tinkondlo letifundvwe eklasini), maka letimbili tekucala kuphela.
3. ESIGABENI B ne-C (Lulwimi Lwasekhaya), nangabe umhlolwa aphendvule imibuto lemibili kulemifisha nobe imibuto lemibili yetindzabambhalo, maka imphendvulo yekucala kuphela uyekele lelandzelako. Nangabe umhlolwa aphendvule yomine imibuto, maka kuphela imphendvulo yembuto wekucala kuleso naleso SIGABA, ngaphandle kwekutsi uphendvule munye umbuto lonemibuto lemifisha namunye umbuto wendzabambhalo.
4. Nangabe umhlolwa anike timphendvulo letimbili lapho imphendvulo yekucala iliphutsa kantsi lena yesibili iliciniso, akumakwe imphendvulo yekucala yesibili ingamakwa.
5. Nangabe tinombolo tetimphendvulo tinemaphutsa, maka ulandzele imemorandamu.
6. Nangabe liphutsa lesipelingi litsikameta inshokutsi, akunganikwa limaki, kantsi nangabe inshokutsi ayitsikameteki, akunikwe limaki.
7. Umbuto wendzabambhalo: Nangabe indzabambhalo inemagama langaphasi kwalawo lemisiwe, umhlolwa akangajeziswa ngobe vele sewutijezise yena ngekwakhe. Nangabe indzabambhalo iyindze kakhulu, akahlolwe ngekwelikhono lakhe bese kucociswana nalabaphetse umsebenti wekumaka. **Akusetjentiswe irubhriki yekumaka indzabambhalo lesesichibiyelweni A ne-B.**
8. Imibuto lemifisha: Nangabe umhlolwa angakafaki bokhulumile nangabe kufanele acaphune **akangajeziswa.**
9. Emibutweni levulekile bahlolwa abanganikwa emamaki nangabe baphendvule ngetimphendvulo letitsi: YEBO/CHA nobe NGIYAVUMA/ ANGIVUMI. Onkhe emamaki anikwa sizatfu/kuchaza ngalokugcwele/kwesekela/kucaphuna.
10. Emibutweni lefuna LICINISO/LIPHUTSA nobe LIPHUZU/UMBONO emamaki akangehlukaniswa emkhatsini, lokusho kutsi alikho limaki lelinikwa LICINISO/LIPHUTSA nobe LIPHUZU/UMBONO, onkhe emamaki anikwa sizatfu/kuchaza ngalokugcwele/kwesekela/kucaphuna.

SIGABA A: TINKONDLO**TINKONDLO LETIFUNDVWE EKLASINI****UMBUTO 1: UMBUTO LOYINDZATJANAMBHALO****NGONENI KUWE MHLABA? – MS Mbuyane****INDZATJANAMBHALO**

Sakhiwo sendzatjanambhalo kumele sivete ***singeniso, umtimba nesiphetfo.***

Tintfo letenta sonkondlo ageke umhlaba.

SINGENISO:

Bahlolwa bachaza sihloko- kunetintfo latsi sonkondlo tenteka emhlabeni letibanga kutsi awugceke lomhlaba, angeneliswa yindlela lempatsa ngayo, lokufaka ekhatsi loku lokulandzelako: Sib. Kungaphatseki kahle, kudzilikelwa yindlu, kungadvudvutwa nahluphekile, kushonelwa tihlobo takhe, njll.

UMTIMBA:

Kuchazwa kabanti ngaloko lokubaliwe enkondlweni lokugcamisa tintfo letenta sonkondlo ageke umhlaba lakhuluma ngawo. Sib.

- Sokondlo utsi wefika emhlabeni wahlangana netinkinga kantsi abetsembe kutsi utawuphatseka kahle.
- Wefika alindzele kudvudvutwa kepha akatange akutfole.
- Wefika etsembe kutsi umhlaba utamvikela etitseni lebeticondze kumlimata, kepha akutange kube njalo.
- Wefika wahlukunyetwa timvula ngekudzilita indlu labehlala kuyo.
- Washonelwa tihlobo takhe kantsi abetsembe kutsi emhlabeni ngeke ashonelwe.
- Abecabanga kutsi emhlabeni utawutfole wonkhe umuntfu anesihe, umusa, luvelo, sihawu nesineke kantsi umhlaba awunakwenta loko.
- Sonkondlo utsi akati kutsi yini lelindzeleke kuye kute umhlaba nalabahlala kuwo bamenelise kuloko labekulindzele.

(Naleminye imibono lenembako lengakabalwa lapha ngenhla yemukelekile.)

SIPHETFO:

Bahlolwa basonga indzatjanambhalo yabo. Basonga ngekubhala ngetintfo letenta sonkondlo ageke umhlaba babuye baphawule ngebubi bawo ekuveteni kutsi awumphatsi kahle kantsi yena abelindzele kunetseteka emhlabeni.

BONA EMARUBHRIKI EKUMAKWA KWENDZATJANAMBHALO YETINKONDLO, SIGABA A.**[10]**

UMBUTO 2: IMIBUTO LEMIFISHA**SHUKELA – FC Nkosi**

- 2.1 Bobabe bayakhala, bayaphela ngawe/Bomake bayakhala bayaphela ngawe. (Kunye kwaloku.) (1)
- 2.2 Usho kutsi imvamisa yebafati bema-Afrika bakhulu ngemtimba kepha shukela ubashaya bondze, kushe wonkhe umtimba, njll. (Naleminye imibono lenembako yemukelekile.) (1)
- 2.3 Sifanangwaca/Sifanangwaca sa B-/Sifanamsindvo sabongwaca B-. (1)
- 2.4 Uyidle kancane, kancane, kancane. (1)
- 2.5 Ngushukela wesifo lobanga kugula ebantfwini, ngobe uhlasela umtimba nengati. (2)
- 2.6 Imibono itawehluka, ifake ekhatsi loku lokulandzelako: Labavumako batawesekela ngekutsi: Iyisathaya ngobe igceka bubi lobubangwa sifo sashukela etimphilweni tebantfu/Igceka kungakhetsi kwalesifo ngekungena ngisho nebantfwana labancane/Igceka kubhubhisa emakhaya kusale kungenamuntfu, njll. (Naleminye imibono lenembako yemukelekile.) Labangavumelani batawesekela labakushoko. (2)
- 2.7 Imibono itawehluka. Labatsi sisetjentiswe ngalokuhambelanako batawesekela ngekutsi: Lesisho sichaza kutsi lesifo sibulala sicotfule kusale kungenamuntfu ekhaya. Usisebentise kahle ngobe lesifo sashukela nangabe singenile ekhaya, sivame kufutiselwana, utfole kutsi wonkhe umndeni ugulwa ngiso, sigcine sicotfule wonkhe umuntfu. (Naleminye imibono lenembako yemukelekile.) Labatsi akakasisebentisi kahle batawesekela labakushoko. (2)

[10]**UMBUTO 3: IMIBUTO LEMIFISHA****TIBANE – NC Mthethwa**

- 3.1 Ngebuhle nekukhanya lokungenambalandlati. (1)
- 3.2 Yimphindvwa. (1)
- 3.3 Emini kunelilanga lelikhanya kutengca/Kuchakata kwato lokungalingani nekwelililanga kutenta tingabonakali, njll. (Naleminye imibono lenembako yemukelekile.) (Kunye kwaloku.) (1)
- 3.4 Kusuke sekulelwe, ebusuku. (1)

- 3.5 Imibono itawehluka ifake ekhatsi loku lokulandzelako:
Kungenteka tingoti letinyenti ngobe kungaba mnyama lonkhe live/Bantfu labahlala emhlabeni ngeke babone labakwentako ngobe kusuke kumnyama/Titjalo ngeke tikhule kahle ngobe tidzinga imisebe yelilanga, njll.
(Naleminye imibono lenembako yemukelekile.) (Kunye kwaloku.) (2)
- 3.6 Imibono itawehluka. Labatsi sisetjentiswe kahle batawesekela ngekutsi: Tinkhanyeti natisesibhakabhakeni tiyachakata tishlobise, lokufana netimbali nangabe tichakatile.
(Naleminye imibono lenembako yemukelekile.)
Labatsi asikasebentiseki kahle batawesekela labakushoko. (2)
- 3.7 Imibono itawehluka. Labatsi yetseke ngalokunembako batawesekela ngekutsi:
Tibane ligama letintfo letiletsa kukhanya njengobe naloku lokushiwo ngulenkondlo kuphatselene netinkhanyeti nato letiletsa kukhanya, lokusho kutsi nato tifana netibane.
(Naleminye imibono lenembako yemukelekile.)
Labatsi ayiketseki ngalokwenembako batawesekela labakushoko. (2)
- [10]**

UMBUTO 4: IMIBUTO LEMIFISHA

LOMFUNDVO – GT Nkosi

- 4.1 Luchumanosiphambano. (1)
- 4.2 Yimfundvo, kute inhlupheko ibaleke/kute bantfu banciphise inhlupheko. (Kunye kwaloku.) (1)
- 4.3 Yimfundvo. (1)
- 4.4 Usuke asafundze wagogodza kulakufundzele/Usuke asahlakanishisiwe ngenca yemfundvo/Usuke asakhalishisiwe engcondvweni ngenca yemfundvo, njll.
(Naleminye imibono lenembako yemukelekile.) (Kunye kwaloku.) (1)
- 4.5 Imibono itawehluka ifake ekhatsi loku lokulandzelako:
Bantfu bangeswela lwati/Bantfu bangeswela imisebenti lefuna labafundzile/Umnotfo welive ungawa/Emafemu lamanyenti angavalwa, njll.
(Naleminye imibono lenembako yemukelekile.) (Kubili kwaloku.) (2)
- 4.6 Imibono itawehluka. Labatsi likhetseke kahle batawesekela ngekutsi: Makoti ngumuntfu lolindzeleke kutsi ente tonkhe tintfo tasemtini tihambe kahle, njengobe nemfundvo yenta imphilo yemuntfu ibe lula, ibe nekuhlakanipha.
(Naleminye imibono lenembako yemukelekile.)
Labatsi alikakhetseki kahle batawesekela ngalokunembako. (2)

- 4.7 Ngumlayeto wekutsi bantfu kufanele bafundze kute bahlakaniphe/ Kulesinye sikhatsi imfundvo iyamkhipha umuntfu enhluphekweni/Kulula kufuna umsebenti lofuna bantfu labawufundzele, njll. (Naleminye imibono lenembako yemukelekile.) (Kubili kwaloku.)

(2)
[10]

NA

INKONDLO LENGAKAFUNDVWA EKLASINI

UMBUTO 5

LICHIBIKATI – JP Shongwe

- 5.1 Akasiy' ingcebo neligugu kuyakh' imphilo, (1)
- 5.2 Luchumanosicalo lwa - 'Nine'/Luchumanosicalo. (1)
- 5.3 Imikhumbi/Tikebhe. (1)
- 5.4 Yimvumelwanosigcino leyecako ya-'kati'/Yimvumelwanosigcino. (1)
- 5.5 Kuliciniso, ngobe tilwane letiphila emantini tihlala kuwo busika nelihlobo. Labatsi akusilo liciniso batawesekela labakushoko. (2)
- 5.6 Lifaneleka ngekutsi indzawo lelitsafa, yindzawo levulekile, nalendlalekile lengenatintsaba nemagcuma njengalo lwandle, lwendlalekile, alubonakali lapho luphelela khona futsi alunatintsaba nemagcuma. (Naleminye imibono lenembako yemukelekile.) (2)
- 5.7 Imibono itawehluka. Labavumako batawesekela ngekutsi: Loku lokushiwo ngulenzima kuliciniso ngobe umlandvo walomuhla awukatinti, uyagucugucuka ngenca yetembusave, lokufaka ekhatsi kuntjintja kwabomengameli, kuntjintjantjintja kwemihambo, kwemasiko, njll. Kantsi lwandle lona aluntjintji luhlala lunjalo. (Naleminye imibono lenembako yemukelekile.) Labaphikisako batawesekela ngalokunembako. (2)

(2)
[10]

SAMBA SESIGABA A: 30

SIGABA B: INOVELI/TEMDZABU**UMBUTO 6: UMBUTO LOYINDZABAMBHALO****LIPHUME NEBOVU – BB Malangwane**

Sakhiwo sendzabambhalo kumele sivete singenisiso, umtimba nesiphetfo.

Umntfu nakunentfo layitsandzako emphilweni, akekho lomunye longamehlukanisa nayo, ngisho kungaba netihibe letitsite.

Singeniso

Umhlolela ngamunye kulindzeleke kutsi achaze sihloko naloko latawucoca ngako endzabenimbhalo yakhe, ngekusho kutsi, umntfu nakunentfo layitsandzako nanobe bantfu bangatsini ngayo, akehlukani nayo njengaLaMagagula labetsandza Lushawulo, lokwatsi nanobe ahlangabetana nebumatima elutsandvweni lwabo, wangehlukani naye. Bahlolwa balindzeleke kutsi bavete kafisha tigateko letinjengekuhleleka bodzadzewabo ngekugana kandlelunganye, kondla umndeni waLushawulo yena angekho, kwakhela zakwabo indlu, njll.

Umtimba

Bahlolwa bangahle bavete kabanti tigateko letiveta loku lokuphatselene naLaMagagula, lokufaka ekhatsi letigateko letilandzelako: Sib.

- Kuhleleka bodzadzewabo - Kwatsi nanobe bodzadzewaboLaMagagula bamhleka kutsi ugane kandlelunganye, wangehlukani naLushawulo, wagcina endze kuye ngobe amtsandza.
 - Kuganwa kwaLushawulo nguTintfombi - Kwatsi nanobe Lushawulo salobole lomunye umfati wate weta naye kaLaMagagula, akutange kumehlukanise naLushawulo ngobe amtsandza.
 - Kungondli bantfwana kwaLushawulo - Kwatsi nanobe Lushawulo angasondli umndeni wakhe, LaMagagula wacolela kutsi kube nguye lowondlako ngekuwa avuka alimana nemasimu ngobe atsandza Lushawulo.
 - Kungeti kwaLushawulo emngcwabeni wemntfwanabo - Kwatsi nanobe Lushawulo ehlulekile kuta emngcwabeni waZembe lowashonela enkelebhini, LaMagagula wangehlukani naLushawulo ngobe amtsandza.
- (Naleminye imibono lenembako lengakabalwa lapha yemukelekile.)

Siphetfo

Bahlolwa basonga konkhe loku lebebacoca ngako lapha ngenhla, ngekuphawula kutsi ngempela lutsandvo labenalo LaMagagula ngaLushawulo, aluzange lucedvwe tihibe lahlangabetana nato emendvweni wakhe.

CAPHELA: Bahlolwa kumele bacaphune tigateko letisenovelini letesekela imibono yabo.

BONA EMARUBHRIKI EKUMAKWA KWENDZABAMBHALO, SIGABA B na C

[25]

UMBUTO 7: IMIBUTO LEMIFISHA**LIPHUME NEBOVU – BB Malangwane**

- 7.1 Kusita kwebantfu ekucimeni umlilo welilonto laLushawulo/Kugijima kwebantfu bayobikela Lushawulo ngekusha kwelilonto/Kubolekwa timphahla tekugcoka emva kwekusha kwelilonto laLushawulo, njll.
(Naleminye imibono lenembako yemukelekile.) (Kubili kwaloku.) (2)
- 7.2 Wakukhombisa ngekutsi aye eJozi lapho Lushawulo sasebenta khona, wamchazela kutsi luphenyo lwemaphoyisa lwatfolo kutsi lilonto lakhe lashiswa ngulenyeye yetintfombi takhe. (2)
- 7.3 Akazange avete ticu tekuba ngumlimisi, wefika watehlisa wafana nabo bonkhe bantfu labatewufuna umsebenti emayini/Bantfu labanyenti bebaye emakhaya bayewulima.
(Kunye kwaloku.) (2)
- 7.4 Basebenti bazuza kwati kubhala/Kwati kufundza/Kwati kubala, njll.
(Kubili kwaloku.) (2)
- 7.5 Imibono itawehluka ifake ekhatsi loku lokulandzelako:
Labatsi bekafanele batawesekela ngekutsi: Lushawulo abengatenti kulalela Tintfombi, abedlisiwe, ngekusho kwenoveli/Bekusebenta umutsi waTintfombi/ Lushawulo abedidwe ngumutsi waTintfombi/Imitsi yaTintfombi yenta kutsi Lushawulo ametsembe kakhulu.
(Naleminye imibono lenembako yemukelekile.) (Kubili kwaloku.)
Labatsi abengakafaneli batawesekela ngemaphuzu lanembako. (2)
- 7.6 Imibono itawehluka ifake ekhatsi loku lokulandzelako:
Abengaboleka imali yekugibela ebanganini bakhe, aye ekhaya/
Abengaboleka imali yekugibela kubothishela bakhe, aye ekhaya/
Abengacela imali kunina kutsi amtfumelele, akwati kugibela/Abengacela labanye babothishela labanetintfo tekuhamba kutsi bampheleketele ekhaya, njll.
(Naleminye imibono lenembako yemukelekile.) (Kubili kwaloku.) (2)
- 7.7 Wahamba nabo ekhaya kubo/Batsatfwa nguLaMagagula wababhasobha/ Bamikiswa kaKhumalo kubabe waLushawulo/Banikwa unina waTintfombi, njll.
(Naleminye imibono lenembako yemukelekile.) (Kunye kwaloku.) (2)
- 7.8 Abefuna kuba nesibindzi sekucosha unina njengobe abemhlonipha angati kutsi utamcosha njani emva kwekuva ngaTintfombi kutsi uyamtsakatsa. (2)
- 7.9 Sisetfulela umlayeto wekutsi kuncono kwetsemba litje kunekwetsemba umuntfu njengobe Lushawulo abetsembe Tintfombi kantsi umkhaya utamkhomba kutsi nguye umtsakatsi labecedza bantfwabakhe.
(Naleminye imibono lenembako yemukelekile.) (2)

- 7.10 Bekavikela kokheleka kwaletinye tindlu lebetakhiwe eceleni kwaleti taTintfombi/Abecabangela lenye yetindlu taTintfombi leyakhiwa nguye/Abenemcondvo wekutsi letindlu taTintfombi betingabuye tisetjentiswe ngesikhatsi lesitako nakunesidzingo kunekutsi tishiswe, njll.
(Naleminye imibono lenembako yemukelekile.) (Kunye kwaloku.) (2)
- 7.11 Imibono itawehluka ifake ekhatsi loku lokulandzelako:
Kungamcoleli/Kumtjela kutsi aye ethuneni lenina ayewucela lucolo/Kumtjela kutsi ayewubonana nebeluleki bengcondvo bamsite kutsi akhohlwe ngalesimo/Kumeluleka kutsi ente umsebenti wekucolisa kunina, njengobe angasekho, kulabo labakholelwa elwatini lwendzabuko, njll.
(Naleminye imibono lenembako yemukelekile.) (Kunye kwaloku.) (2)
- 7.12 Imibono itawehluka:
Labatsi besifanele batawesekela ngekutsi: Lushawulo abengatetsembi tinyanga ngobe abetibita ngekutsi bantfu bemanga/Lushawulo abengabata kutsi tinyanga tiyayati intfo lebetiyikhuluma/Abefuna kutsi umtsakatsi abonwe ngunobe ngubani khona atawuba nebufakazi/Abetsebele kakhulu emkhayeni, njll.
(Naleminye imibono lenembako yemukelekile.)
Labatsi besingakafaneli batawesekela ngalokusenovelini. (3)
[25]

UMBUTO 8: UMBUTO LOYINDZABAMBHALO

KUBAMBA LETINGELAKO – DE Nkosi

Sakhiwo sendzabambhalo kumele sivete ***singeniso, umtimba nesiphetfo***.

Umntfu nakunentfo layitsandzako emphilweni, akekho lomunye longamehlukanisa nayo, ngisho kungaba netihibe.

Singeniso

Umdlolwa ngamunye kulindzeleke kutsi achaze sihloko naloko latawucoca ngako endzabenimbhalo yakhe, ngekusho kutsi, umntfu nakunentfo layitsandzako nanobe bantfu bangatsini ngayo, akehlukani nayo njengaMphikeleli labetsandza imfundvo nemmango wangakubo lokwatsi nanobe ahlangebetana nebumatima emfundvweni yakhe nasemmangweni wangehlukani nako. Bahlolwa balindzeleke kutsi bavete kafisha tigateko letinjengekuncishwa kwakhe indzawo yekuhlala, kucoshwa kwakhe esikolweni, kutfunyelelwa emaphoyisa kutsi ayewumsesha, kuvukelwa ngummango, njll.

Umtimba

Bahlolwa bangahle bavete kabanti tigateko letiveta loku lokuphatselene naMphikeleli, lokufaka ekhatsi letigateko letilandzelako: Sib.

- Kuncishwa indzawo yekuhlala - Kwatsi nanobe Sikhulu Tsabetse amncisha indzawo yekuhlala yena wachubeka nekuyifuna wate wayitfolo atewuchubeka ngemfundvo yakhe.
- Kucoshwa esikolweni - Kwatsi nanobe Sikhulu Tsabetse amcoshisa esikolweni ngetizatfu letingaphatseki, yena akatange aphela emandla, walwela kubuyiselwa esikolweni wagcine abuyele wachubeka nekufundza.

- Kutfunyelelwa emaphoyisa atewumsesha – Kwatsi nanobe Sikhulu Tsabetse amtfumelela emaphoyisa atewusesha likamelo lakhe ngalesikhatsi asenyuvesi, ngobe kutsiwa unetikhali netidzakamiva, yena akatange ayishiye phasi imfundvo, wachubeka nayo wate watfolatidu takhe.
- Kuvukelwa licembu lelitsite - Kwatsi nanobe kunelicembu lelimvukelako ngekungeneliswa yimfundziso yetembusave lekutsiwa uyihlanyela elusheni, yena akatange ayekele kusebentela ummango ngekuwutfutukisa futsi wagcina asanguSosifundzave.

(Naleminye imibono lenembako yemukelekile.)

Siphetfo

Bahlolwa basonga konkhe loku lebebacoca ngako lapha ngenhla, ngekuphawula kutsi ngempela lutsandvo labenalo Mphikeleli ngemfundvo nangemmango alutange lucedvwe tihibe lahlangabetana nato emmangweni waseMbalenhle.

CAPHELA: Bahlolwa kumele bacaphune tigateko letisendzabeni letesekela imibono yabo.

BONA EMARUBHRIKI EKUMAKWA KWENDZABAMBHALO, SIGABA B na C

[25]

UMBUTO 9: IMIBUTO LEMIFISHA

KUBAMBA LETINGELAKO – DE Nkosi

- 9.1 Watsi bantfu kufanele bakhelwe tindlu/Bakhelwe imitfolamphilo/Labadzala baye etikolweni tantsambama, njll.
(Naleminye imibono yemukelekile.) (2)
- 9.2 Etikolweni/Emaphalamende/Emasontfweni/Emimangweni/Emawadini, njll.
(Naleminye imibono lenembako yemukelekile.) (2)
- 9.3 NguLaNgomane, ngobe uvela ekucaleni kwalenoveli ngalesikhatsi Mphikeleli ayewufuna indzawo kaMvakali, akukho lapho atfolakala khona futsi, lokusho kutsi lendzaba ingachubeka ngaphandle kwakhe ingaphatamiseki.
(Naleminye imibono lenembako yemukelekile.) (2)
- 9.4 Kwamenta wakhutsala etifundvweni takhe njengobe bekafundza nebantfwana labancane kuye lebekungeke kube kühle kwehlulwa ngibo/Ingcondvo yakhe beseyihlutekile ngobe abesakhulile.
(Kunye kwaloku.) (2)
- 9.5 Lapha kuletheksthi Khulumile ukhutsata kusebenta ngekubambisana emkhatsini wemaphoyisa nabologadza, kantsi emmangweni lesiphila kuwo labanye bologadza batsatfwa njengebantfu lekufanele bagadze indzawo nobe sikhungo lesitsite kuphela bangangeneleli emisebentini leyentiwa ngemaphoyisa.
(Naleminye imibono lenembako yemukelekile.) (2)

- 9.6 Lesibindzi bekasinikwa kutitjela kutsi yena wekutsalwa kulendzawo kantsi Mphikeleli akasuye/Beketsembe kutsi kunebantfu labatamesekela njengobe abesakhe licembu lakhe/Magumeni bekacabanga kutsi batawuhlonipha sikhundla sakhe sebuthishela njengobe bekahlonishwa emmangweni, njll.
(Naleminye imibono lenembako yemukelekile.) (2)
- 9.7 Kungenteka kutsi belisetjentiswa boSikhulu Tsabetse njengobe abesebentela hulumende welubandlululo/Bebangenalwati lwaMphikeleli ngetembusave, njll.
(Naleminye imibono lenembako yemukelekile.) (Kunye kwaloku.) (2)
- 9.8 Imibono itawehluka ifake ekhatsi loku lokulandzelako:
Kungenteka waba nemoni kutsi Khulumile sewutawushada naMphikeleli lotawuba ngusosifundzave/Kungenteka naye bekasetjentiswa boSikhulu Tsabetse njengobe abesebentela hulumende welubandlululo/Abetsandza Magumeni njengemfana wendzawo, njll.
(Naleminye imibono lenembako yemukelekile.) (Kunye kwaloku.) (2)
- 9.9 Bekafuna kugcamisa inhlotiyo lelukhuni yaSikhulu Tsabetse njengobe LaDladla wetama kumbonisa kutsi akalalele Mphikeleli etfule inkinga yakhe, kepha wala waphetsa Tsabetse/Bekuyindlela yekwetfula bunjalo bakhe.
(Nalemiye imibono yemukelekile.) (Kunye kwaloku.) (2)
- 9.10 Abentiwa kumvela kutsi akanabatali futsi akukho umuntfu longammela/Abefuna lusito lwaMphikeleli lwekusita Msiti etifundvweni.
(Nalemiye imibono yemukelekile.) (Kunye kwaloku.) (2)
- 9.11 Imibono itawehluka ifake ekhatsi loku lokulandzelako:
Labangavumi batawesekela ngekutsi: Tsabetse ushone kusalindzelwe imiphumela yelukhetfo lwabososifundzave lapho Magumeni abeyimbangi yaMphikeleli, ngaloko bekungeke kube nekubuyisana/Kwelekelela kwaMphikeleli emsebentini wekungcwatjwa kwaSikhulu Tsabetse akunasiciniseko sekutsi seabuyisene, Mphikeleli bekenta umsebenti wakhe njengelikhansela, njll.
(Naleminye imibono lenembako yemukelekile.)
Labavumako batawesekela ngemaphuzu lanembako. (2)
- 9.12 Imibono itawehluka ifake ekhatsi loku lokulandzelako:
Kungabi nendzaba nekufa kwakhe/Kungatibandzakanyi ngemalungiselelo emngcwabo/Kungayi ngisho nasemngcwabeni/Kungafuni nekwati kutsi ummango utawusita ngayiphi indlela/Kusita kute kubonakale kutsi ulikhansela lelingenamagcubu, njll.
(Naleminye imibono lenembako yemukelekile.) (3)

[25]

UMBUTO 10: UMBUTO LOYINDZABAMBHALO**TIBOPHO TELUTSANDVO – JJ Thwala**

Sakhiwo sendzabambhalo kumele sivete *singeniso, umtimba nesiphetfo*.

Umntfu nakunentfo layitsandzako emphilweni yakhe, akekho lomunye longamehlukanisa nayo, ngisho kungaba netihibe letitsite.

Singeniso

Umhlolwa ngamunye kulindzeleke kutsi achaze sihloko naloko latawucoca ngako endzabenimbhalo yakhe, ngekusho kutsi, umntfu nakunentfo layitsandzako nanobe bantfu bangatsini ngayo, akehlukani nayo njengaMlungisi labetsandza Lomusa lokwatsi nanobe ahlangebetana nebumatima elutsandvweni lwabo wangehlukani naye. Bahlolwa balindzeleke kutsi bavete kafisha tigateko latimela Mlungisi, letinjengekugcoka inzilo kwaLomusa, kushaywa nguMacaleni, kubona Lomusa asebentisa tidzakamiva, njll.

Umtimba.

Bahlolwa bangahle bavete kabanti tigateko letiveta loku lokuphatselene naMlungisi, lokufaka ekhatsi letigateko letilandzelako: Sib.

Sib.

- Kugcoka kwaLomusa inzilo – Kwatsi nanobe Lomusa azilele indvodza yakhe, Mlungisi wangayekeli kumeshela, wachubeka ngobe amtsandza.
- Kushaywa nguMacaleni – Kwatsi nanobe Macaleni amlwisa ngaLomusa, yena wangayekeli kumtsandza.
- Kusetjentiswa kwetidzakamiva kwaLomusa – Kwatsi nanobe abona Lomusa asebentisa tidzakamiva, akatange amlahle, wachubeka watsandzana naye wate wamlobola.
- Kuhamba ebusuku kwaLomusa – Kwatsi nanobe atibonele kutsi Lomusa uhlala nemadvodza ebusuku, lapho kunatfwa khona tjwala, Mlungisi wangehlukani naye, wachubeka nekwenta emalungiselelo emshado.
- Kuba ngumngani waNkhangala - Kwatsi nanobe Lomusa angumngani wemntfu loshushumbisa tidzakamiva, Mlungisi akatange amlahle, kodvwa wachubeka wamtsandza.

(Naleminye imibono lenembako yemukelekile.)

Siphetfo

Bahlolwa basonga konkhe loku labebacoca ngako lapha ngenhla, ngekuphawula kutsi, ngempela, lutsandvo labenalo Mlungisi ngalomusa alutange lucedvwe tihibe lahlangebetana nato emphilweni yakhe.

CAPHELA: Bahlolwa kumele bacaphune tigateko letisenovelini letesekela imibono yabo.

BONA EMARUBHRIKI EKUMAKWA KWENDZABAMBHALO, SICHIBIYELO B na C [25]

UMBUTO 11: IMIBUTO LEMIFISHA**TIBOPHO TELUTSANDVO – JJ Thwala**

- 11.1 Yimfihlo yekutsi letembatfo tiyinzilo/Kutsi uzilile/Kutsi udla tidzakamiva/Kutsi usidzakwa.
(Kunye kwaloku.) (2)
- 11.2 Imveta angumuntfu labengalubhadzi esontfweni/Abephila imphilo yekungakhohwa/Abengenalo libandla lacondzene nalo.
(Kunye kwaloku.) (2)
- 11.3 Macaleni bekahlalela kwenta emacala, washaya Mlungisi ngalesikhatsi bahlangana kaLomusa, kubeka umuntfu sandla kulicala/Watfolakala aboshwa naboLomusa ngemacala ekutsengisa tidzakamiva, kuntjontja nekubulala.
(Kunye kwaloku.) (2)
- 11.4 Wagcoka inzilo emva kwekushona kwemyeni wakhe/Ngalesikhatsi Mlungisi awelwe yindvuku yakhe beme bobabili, Lomusa wagobondzela wayitsatsa wamnika/Wafihlela Mlungisi similo sakhe lesibi, njll.
(Naleminye imibono lenembako yemukelekile.) (Kubili kwaloku.) (2)
- 11.5 Lomusa walotjolelwa emcashweni kantsi emimangweni lesiphila kuyo intfombi ilotjolelwa kabo/Akatange wabikwa kulabadzala ngembikwekulotjolwa kantsi emimangweni lesiphila kuyo intfombi iyabikwa ekhabojaha kucala.
(Naleminye imibono lenembako yemukelekile.) (Kunye kwaloku.) (2)
- 11.6 Labavumako batawesekela ngekutsi:
Kushiwo ngobe Lomusa abegula, lokungenteka kutsi lokugula wakwendlulisela Mlungisi.
Labangavumi batawesekela ngekutsi nanobe Lomusa abegula akatange amengcisele Mlungisi ngobe ngahle bebasebentisa lijazi lemkhwenyane nabaya emacasini.
(Naleminye imibono lenembako yemukelekile.) (2)
- 11.7 Abesaba kutsi Mlungisi angate antjintje umcondvo ngaletintfo latibonako letinjengetidzakamiva, bese akasachubeki nekumtsatsa/Abesambonile kutsi unemali utamudla malula nasatibita ngemkakhe.
(Naleminye imibono lenembako yemukelekile.) (Kunye kwaloku.) (2)
- 11.8 Imibono itaweuhluka ifake ekhatsi lokulandzelako:
Kumecwayisa kutsi ehlukane netidzakamiva/Kumecwayisa kutsi ayekele bugebengu ngobe utawuboshwa/Kumecwayisa kutsi alindze kute kufike sikhatsi sekukhumula inzilo bese uyagana/Kumecwayisa kutsi akhetse bangani labatambonisa indlela lenhle, njll.
(Naleminye imibono lenembako yemukelekile.) (2)
- 11.9 Abeyewutibonela ngewakhe emehlo kutsi impela Mlungisi uyashada/Abefuna kuyewuhlaza Mlungisi ngekumjikijela ngemntfwana/Abefuna kuyewumisa umshado ngobe naye anemntfwana naMlungisi, njll.
(Naleminye imibono lenembako yemukelekile.) (Kunye kwaloku.) (2)

- 11.10 Mlungisi abetawuphila kahle ngaphandle kwetinkinga njengobe Sitsembile abengayenti lemikhuba leyentiwa nguLomusa/Abetawusimama ngasetimalini ngobe bekutawubete umuntfu loloku amcela imali ngemachinga ngobe Sitsembile abesebenta/Abengeke abe netinkinga teliphupho leyise, njll. (Naleminye imibono lenembako yemukelekile.) (2)
- 11.11 Imibono itaweuhluka, labatsi sikhethseke kahle batawesekela ngekutsi: Mlungisi abebanjwe tibopho telutsandvo lwekutsandza Lomusa, angakhoni kuphuma kuto njengobe nesihloko sikhuluma ngeTibopho Telutsandvo. (Naleminye imibono lenembako yemukelekile.) Labatsi asikakhetseki kahle batawesekela ngemaphuzu lanembako. (2)
- 11.12 Lesaga sisho kutsi umuntfu angaba muhle kantsi lukhulu lolubi lalufihle ngekhatshi kwakhe njengaLomusa labemuhle kepha tento takhe betitimbi, adla abuye atsengisa tidzakamiva, antjontja futsi angumbulali. (Naleminye imibono lenembako yemukelekile.) (3)

[25]**NOBE****UMBUTO 12: UMBUTO LOYINDZABAMBHALO****SILULU SEMASWATI – NC Mthethwa**

Sakhiwo sendzabambhalo kumele sivete singeniso, umtimba nesiphetho.

Simo semoya lesisemibhalweni yetemdzabu.

SINGENISO:

Umhlolwa ngamunye uchaza sihloko sendzabambhalo lesisimo semoya endzabeni yetemibhalo yemdzabu nendlela lesivetwe ngayo.

UMTIMBA:

Bahlolwa bangahle baphawule ngemaphuzu lafaka ekhatshi lawa lalandzelako: Sib.

Indlulamitsi nengwenya:

- Umoya wekuvana – Lomoya uvetwe ngendlulamitsi levana nengwenya tite tivakashelane, lokungakavami etilwaneni ngobe ingwenya yesatjwa kakhulu. Ubuye wavetwa kuvana emkhatsini wetilwane lebetihlala kuleyo ndzawo ngekutjela kutsi betifuna kuyewuyivakashela.
- Umoya wekwesaba – Lomoya uvetwe tilwane lebetivana nendlulamitsi kodvwa tingakhoni kuyewuyivakashela ngekwesaba umngani wendlulamitsi, ingwenya, ngobe tesaba kudliwa, 'umlomo wayo lomkhulu.'
- Umoya wekucabana/wekungevani – Lomoya uvetwe ngendlulamitsi leycabana nengwenya ngobe indlulamitsi ingavumi kuyewuvakashela ingwenya ngesizatfu sekungakwati kuhlamba kantsi ingwenya seyibuya kuyewuvakasha kendlulamitsi. (Naleminye imibono lenembako lengakabalwa lapha ngenhla yemukelekile.)

Tibongo TaNgwane III

- Umoya wekugceka – Lomoya uvetwe ngekugceka ngelulaka Ngwane III lanalo ekhaya nangaphandle nangekutsi ashaye emantfombatane ngalesikhatsi bonina bangekho, kute kwetfuke emadvodza.
- Umoya wekuvana – Lomoya uvetwe ngekukhuluma ngekutsi ulichibi lelinatfwa ngemadvodza, lokusho kutsi bekevana nemadvodza ngobe naku tidzandzane abetishaya.
- Umoya welubandlululo – Lomoya uvetwe ngekutsi abevana nemadvodza kantsi tidzandzane abetishaya.
- Umoya welutsandvo – Lomoya uvetwe ngekutsi Ngwane III alilitele ngagogo wakhe waseNkayaneni.
- Umoya wekuhlonipha – Lomoya uvetwe ngekutsi Ngwane III agucelwe tindvuna nemadvodza ngobe abusa litiko lelingenahlumela lendvodza, lokukhomba kumhlonipha.
- Umoya wekudvumisa – Lomoya uvetwe ngekutsi Ngwane III advunyswe, ashayelwe Bayethe, abitwe nangetinanatelo takaMlangeni.
(Naleminye imibono lenembako lengakabalwa lapha yemukelekile.)

SIPHETFO:

Umhlolwa ngamunye ulindzeleke kutsi asonge konkhe labekhuluma ngako endzabenimbhalo yakhe, ngekuveta kutsi tonkhe tigameko letentekako emibhalweni yetemdzabu tiyindlela umbhali letfula ngayo simo semoya wendzaba nobe ummango njengobe tonkhe tigameko tenteka ngaphasi kwesimo lesitsite.

BONA EMARUBHRIKI EKUMAKWA KWENDZABAMBHALO, SIGABA B ne–C**[25]****UMBUTO 13: IMIBUTO LEMIFISHA****SILULU SEMASWATI – NC Mthethwa**

- 13.1 Umfana abehlala nenina uyise sekukudzala ashona. (2)
- 13.2 Insweleko ibangelwa kushona kweyise wemfana, yena nenina bahlupheke beswele kudla nekwewembatsa, lokwenta ate ayewufuna umsebenti. (2)
- 13.3 Tifundza kutsi kubeketela kuyakhokhela ekugcineni ngobe umfana wabeketela wagine anikwe lidada lelitala emacandza egolide lamletsela imali/Tifundza kutsi salakutjelwa sibona ngemopho ngobe umfana akatange alalele umlumbi nenina ngalesikhatsi batsi angacali alibulale lidada, walibulala kwaba kuphela kwekunjinga lebekuletfwa ngemacandza egolide labetalelwa lidada, njll.
(Naleminye imibono lenembako yemukelekile.) (2)
- 13.4 Kubangelwa lidada lelitala emacandza egolide, intfo lengakate yenteke. (2)
- 13.5 Kusebentisa ligolide abe angenalo lilungelo nobe tincwadzi tekuliphatsa kumbe kulitsengisa, lokulicala lelibovu.
(Naleminye imibono lenembako yemukelekile.) (2)

- 13.6 Imibono itawehluka ifake ekhatsi loku lokulandzelako:
Kumcosha angaphindzi abuye ngekulandza inhlupheko
lebesebehlukene nayo/Kwemukela kutsi angeke basaba nemali ngobe
lidada beselifile/Kumecwayisa kutsi ayewufuna lomunye umsebenti kute
bachubeke nekuphila kahle, njll.
(Naleminye imibono lenembako yemukelekile.) (2)
- 13.7 Imibono itawehluka:
Lesaga sisho kutsi umuntfu longafuni kulalela ugcina kabi.
Labatsi siyahambisana, batawesekela ngekutsi: Lokwenteka
kulenganekwane kutsi umfana angalaleli umyalo wemlumbi wakhe
newenina wekutsi angalibulali lidada, yena alibulale, kwagcina kuphele
umnotfo wemacandza egolide.
(Naleminye imibono lenembako yemukelekile.)
Labatsi asihambisani batawesekela labakushoko. (3)
- 13.8 Sihabiso. (1)
- 13.9 'Lohlokohe timbiba taphuma' - kuhlokohe kusho kucala intfo itihlalele,
njengeNgwenyama Bhunu labecala bantfu- timbiba. (1)
- 13.10 Sicedzelelamcondvo/I-enjambamenti. (1)
- 13.11 Uyiveta ingumuntfu lophanako ngekudla/Uyiveta ingumuntfu longagovuki
nekudla, njll.
(Naleminye imibono lenembako yemukelekile.) (Kunye kwaloku.) (1)
- 13.12 Imibono itawehluka ifake ekhatsi loku lokulandzelako:
Beyenta tintfo letehlukile kuletentiwa ngulabanye/Yenta tintfo ngendlela
lefuna ngayo, njll.
(Naleminye imibono lenembako yemukelekile.) (2)
- 13.13 Ligodze yintfo lesetjentiselwa kutsiya tinyamatane. Kulomugca kusho kutsi
Ingwenyama Bhunu beyisitsiyo esigodlweni sakaZombodze. Loku
kuhambisana nemasiko ngobe vele inkhosi iba ngiyo lebuka kuhamba kahle
kwetintfo esigodlweni.
(Naleminye imibono lenembako yemukelekile.) (2)
- 13.14 Imibono itawehluka. Labatsi siyahambisana batawesekela ngekutsi:
Ingwe silwane lesiyingoti ngobe siyabulala, lokusho kutsi nayo
Ingwenyama Bhunu beyiyingoti ngobe lomugca uyiveta yehlula tive
letinemandla lokukudla ematfole enyatsi.
(Naleminye imibono lenembako yemukelekile.)
Labatsi asihambisani batawesekela labakushoko. (2)

[25]

SAMBA SESIGABA B: 25

SIGABA C: UMDLALO**UMBUTO 14: UMBUTO LOYINDZABAMBHALO****KUTAWUBA NJALO – SZ Simelane**

Sakhiwo sendzabambhalo kumele sivete *singeniso, umtimba nesiphetfo*.

'Sitsa semuntfu ngeke siyivimbe impumelelo yakhe.' Kubhekiswa kuMphotfo.

Singeniso

Umdlalo ngamunye kulindzeleke kutsi achaze sihloko naloko latawucoca ngako endzabenimbhalo yakhe ngekusho kutsi bantfu labatitsa takho ngeke bayivimbe impumelelo yakho, njengalaHleta nalabanye lebebangafuni kubona Mphotfo aphumelelela. Bahlolwa kulindzeleke kutsi bavete ngalokufisha tigateko lapho titsa taMphotfo tenta lokubi kuye kwetama kuvimbela impumelelo yakhe, kodvwa tehluleka, kufaka ekhatsi kuphatfwa kabi nguCelani, kungatsandvwa nguLaHleta, kucamba emanga kwaHleta elucingweni, njll.

Umtimba

Bahlolwa bangahle bavete kabanti tigateko letifaka ekhatsi leti letilandzelako: Sib.

- **Celani** - wabukisa ngaMphotfo esikolweni ambita ngesichaga nakamtfola ahamba naNcobile. Loku akutange kuyibuyisele emuva imphilo yaMphotfo, waphumelela wagcina ashadile naNcobile.
- **LaHleta** - wavukwa lulaka nabona Mphotfo ahamba naNcobile, ambita nangeluphuya, washaya Ncobile ngobe atsi ugane mandzafu wabuye wacosha Mphotfo kabuhlungu esibhedlela ngobe angafuni abonane naNcobile. Tenta taLaHleta atitange tiphumelele kubehlukanisa. Mphotfo waphumelela wagcina ashade naNcobile.
- Wehluleka kusita Mphotfo ngekuyewumcelela lusito kumfundisi kutsi asitwe ngetimali ngobe amenyanya. Loku akutange kuyivimbe impumelelelo yaMphotfo, wakhona kumelana nebumatima labebukene nabo, wafundza wagcina asangudokotela.
- **Hleta** - wenta licebo lekwehlukanisa Mphotfo naNcobile ngekutsi ashaye Mphotfo acambe emanga atsi sisu asisiso sakhe saCelani futsi sesibikiwe kaMavimbela. Licebo lakhe atange liphumelele ngobe ekugcineni Mphotfo naNcobile bagcina bacolelene babuye bashada.

(Naleminywe imibono lenembako lengakabalwa ngenhla yemukelekile.)

Siphetfo

Bahlolwa basonga konkhe loku labebacoca ngako lapha ngenhla, ngekuphawula kutsi konkhe lebekwentiwa titsa taMphotfo kuye akutange kuphumelele ngobe Mphotfo wagcina asashadile naNcobile futsi wagcina asafundze wagogodza waba ngudokotela.

CAPHELA: Bahlolwa kumele bacaphune tigateko letisemdlalweni letesekela imibono yabo.

BONA EMARUBHRIKI EKUMAKWA KWENDZABAMBHALO, SICHIBIYELO B na C

[25]

UMBUTO 15: IMIBUTO LEMIFISHA**KUTAWUBA NJALO – SZ Simelane**

- 15.1 Celani utsandza emantfombatane kakhulu lokungadala kucabana nemkakhe/ Akanabuntfu, ubukela labanye bantfu phasi/Utsandza ludlame/Ungumuntfu wetimfihlo, wehluleka kutjela Ncobile kutsi imali latsenga ngayo timoti wayitsatsaphi, njll. (2)
- 15.2 Ncobile abeneluvelo, wakhona kuvelana naMphotfo kulesimo labekuso njengekucela unina kutsi akhulume nemfundisi kutsi asitwe ngemali yelisonfotfo/ Bekakhutsata bontsanga yakhe kutsi babambelele emfundvweni yabo/ Bekangatsandzi umuntfu ngobe aphetse lokutsite, kodvwa buntfu bakhe/ Bekangumuntfu locelelako ngobe wagcina amcolele/Bekakhona kuvuma liphutsa lakhe aphindze alungise lapho one khona njengakunina, njll. (2)
- 15.3 Batali bakadzeni bebendzisa bantfwababo ekhaya lelitsite ngekubuka kutsi kuyasutfwa kulelo khaya, nekutsi lilikhaya lelihlonishwako lapho angeke ahlupheke khona. Loku kwehlukile kulokwenteka kulomdlalo, akwendziselwana njengaNcobile lowatikhetsela Gedlembane, Celani naMphotfo, unina wamesekela kulakukhetsile. (Naleminye imibono lenembako yemukelekile.) (2)
- 15.4 Ncobile nakasesibhedlela ayewutfofola luswane wahlolwa bangani kunenina/ Emva kwekulimala kabi kwaNcobile batali bakhe behluleka kumyisa esibhedlela wate wayiswa nguNcane/Ncane emva kwekuphutselwa esikolweni sikhatsi lesidze welulekwa nguNcobile kutsi abuyele esikolweni/Ncobile tincwadzi tesikolo waletselwa nguMphotfo kute angasaleli emuva, batali behluleka kukwenta loko, njll. (Naleminye imibono lenembako yemukelekile.) (2)
- 15.5 Imibono itawehluka ifake ekhatsi loku: Lamavi akemukeleki ngobe lusha lwalomuhla etindzabeni telutsandvo lubuka imali emntfwini/Lubuka kutsi umuntfu udvume kangakanani/Lubuka kutsi umuntfu muhle kangakanani/ Lubuka kutsi umuntfu uhamba ngemoti lenjani/Lubuka kutsi umuntfu usebenta msebenti muni, alubuki buntfu nekutiphatsa kwakhe, njll. (Naleminye imibono lenembako yemukelekile.) Labangavumelani nembono batawesekela ngalokusemdlalweni. (2)
- 15.6 Imibono itawehluka ifake ekhatsi loku: Bebadliwa satelo kutsi ngibo lababulala Gedlembane/Bebacabanga kutsi nakungavela kutsi ngibo babulali, ummango utabavukela/Bebangeke baye emngcwabeni wemuntfu labamtondzako futsi labambulala, njll. (Naleminye imibono lenembako yemukelekile.) (2)
- 15.7 Imibono itawehluka ifake ekhatsi loku: Njengobe Celani naMphotfo bebabanga Ncobile, tetsamelilwati betilindzele kutsi bagcine babambene ngetandla balwa, babulalane, indzaba yabo ingapheleli ekukhulumisaneni nje kuphela njengobe kwenteka encwadzini. (Naleminye imibono lenembako yemukelekile.) (2)

- 15.8 Imibono itawehluka ifake ekhatsi loku: Kutfumela Litiko Letemphilo kuyewufundzisa ngekutiphatsa nangekuya emacasini kute kuvikelwe kukhulelwa/Kuvula umklamo wekufundzisa lusha ngekutiphatsa/Kucela bomake labaphetse temasiko kutewufundzisa bantfwana ngekutiphatsa kahle nawungumuntfu lomusha/Kukhutsata bafundzi kugcina emasiko njengekuya emhlangeni, njll.
(Naleminye imibono lenembako yemukelekile.) (2)
- 15.9 Imibono itawehluka ifake ekhatsi loku: Wawemukela ngekujabula lokukhulu ngatsi nawo ete kulomshado wemshana wakhe/Kuwajabulela kwakhe bekungate kudide emaphoyisa kutsi kukhona lakwatiko/Bekungatsi abelahlisa umkhondvo kutsi emaphoyisa abe nekungabata kutsi nguye umbulali/Hleta watitsela ngalabandzako nakawemukela njengemuntfu lomsulwa, njll.
(Naleminye imibono lenembako yemukelekile.) (2)
- 15.10 Imibono itawehluka ifake ekhatsi loku: Bafundzi bekufanele balandzele imitsetfo nemigomo lemayelana nekuphutselwa esikolweni/Thishela weliklasi lemfundzi lophutselwa njengaNcane bekumele ete nebatali bakhe esikolweni batewuchaza ngembangela yekuphutselwa kwakhe/Sikolo sifune sizatfu lesivakalako nalesicinile sekuphutselwa kwakhe, njll.
(Naleminye imibono lenembako yemukelekile.) (2)
- 15.11 Imibono itawehluka. Labavumako batawesekela ngekutsi: Umntfwana nanobe ungamkhulisa ngesandla lesicinile nobe lesitsambile, nakafuna kuphunyuka, uyaphunyuka akuphambe njengaLaHleta unina waNcobile, lowetama kutsi akhulise Ncobile ngesandla lesicinile kodvwa wamphunyukena kunjalo, watfolakala asakhulelwe ekugcineni.
(Naleminye imibono lenembako yemukelekile.)
Labaphikisako batawesekela ngalokusemdlalweni. (2)
- 15.12 Lesaga sichaza kutsi tinkinga telikhaya lakho atitjelwa bantfu bangaphandle. LaHleta uyahambisana nalesaga ngekutsi njalo nabehlangabetana netinkinga ngaNcobile abebikela belusendvo lwakaMagagula nelwakaHleta kutsi lumbonise, njengalapho Ncobile abengasafuni kwenta lutfo ekhaya nabuya esikolweni, wacela Hleta kutsi amekhute/Kugana nekukhuleliswa kwaNcobile nguMphotfo, wabonisana ngako naHleta naLaMagagula, hhayi nebantfu labalukhuni, njll.
(Naleminye imibono lenembako yemukelekile.) (3)

[25]

UMBUTO 16: UMBUTO LOYINDZABAMBHALO**LAMI LISIPHETFO – JJ Thwala**

Sakhiwo sendzabambhalo kumele sivete singeniso, umtimba nesiphetfo.

'Sitsa semuntfu ngeke siyivimbe impumelelo yakhe.' Kubhekiswa kuSomhlolo.

Singeniso

Umdlolwa ngamunye kulindzeleke kutsi achaze sihloko naloko latawucoca ngako endzabenimbhalo yakhe ngekusho kutsi, bantfu labatitsa takho ngeke bayivimbe impumelelo yakho njengaMahubhulu labengafuni kubona Somhlolo aphumelela. Bahlolwa kulindzeleke kutsi bavete ngalokufisha tigateko lapho titsa taSomhlolo tenta lokubi kuye kwetama kuvimbela impumelelo yakhe, kufaka ekhatsi kuhlela kwaMahubhulu kuketula umbuso waSomhlolo, kufaka kwakhe umoya lomubi kuletinye tindvuna kutsi tivukele umbuso, kugucula tinkhulumo latfunywe tona, njll.

Umtimba

Bahlolwa bangahle bavete kabanti tigateko letifaka ekhatsi leti letilandzelako: Sib.

Sitsa saSomhlolo - Mahubhulu

- Wafaka umoya kuSigogodvolo wekutsi kuketulwe umbuso waSomhlolo. Loku akutange kuphumelele ngobe luhlelo lwenkhosi lwekudala kuthula esiveni sayo lwaphumelela ngekutsi Sigogodvolo agcine sekeme ngasehlangotsini lwaletinye tindvuna letivumelana neluhlelo lwenkhosi.
- Mahubhulu wetama kugucula latfunywe kona nguSomhlolo kuMabhoko, inkhosi yaseMachibini kuyekwakha buhlobo, ngekutsi atjele Mabhoko kutsi Somhlolo ufuna kumhlasela, lokuncono agadle kucala. Emacebo akhe akatange aphumelele ngobe inkhosi yagcina ibakhile buhlobo naMabhoko ngekutsi kutekwe Letsalucolo lokwenta kutsi kudaleke kuthula nekubambisana kuletive letibomakhelwane.
- Wetama kuhlangana naMabhula, inkhosi yebeSutfu kutsi bente umbutfo munye kute kuhlaselwe sive saNdvungunya. Lisu lakhe lehluleka ngobe Mabhula ngemuva kwekuva emanga aMahubhulu ekutsi Somhlolo ufuna kumhlasela, wavele wabaleka lokwenta kube lula kutsi luhlelo lwaSomhlolo lwekuletsa kuthula luphumelele.
- Mahubhulu bekaliphiciphici, atishaya sengatsi uyindvuna letsembekile yaSomhlolo, kantsi uhlangana netitsa taSomhlolo ngasese atetsembise tikhundla letisetulu nangabe titawuhlanganyela naye ekuketuleni umbuso waSomhlolo. Lamachinga akhe atange aphumelele ngobe Somhlolo wagcina aphumelele kuhlanganisa onkhe lamakhosi netikhulu tetive lebekakhelene nato, kwasetjentiswana ngekuthula.

(Naleminywe imibono lenembako lengakabalwa ngenhla yemukelekile.)

Siphetfo

Bahlolwa basonga konkhe loku lebebacoca ngako lapha ngenhla, ngekuphawula kutsi konkhe lebekwentiwa titsa taSomhlolo kuye akutange kuphumelele ngobe tifiso taSomhlolo tekubona live lakhe linekuthula futsi litintile taphumelela.

CAPHELA: Bahlolwa kumele bacaphune tigateko letisemdlalweni letesekela imibono yabo.

BONA EMARUBHRIKI EKUMAKWA KWENDZABAMBHALO, SIGABA B ne–C.

[25]

UMBUTO 17: IMIBUTO LEMIFISHA**LAMI LISIPHETFO – JJ Thwala**

- 17.1 Mahubhulu watjela emabutfo kutsi ayewuhlasela letinye tive letakhelene nabo, kodvwa lowo mtamo awumange uphumelele ngobe emabutfo ahamba aya emgidvweni labemenywe kuwo esigodlweni/Wehluleka ngobe kute tindvuna letawutsenga umbono wakhe wekuvumela emabutfo ayewuhlasela, njll. (2)
- 17.2 Imibono itawehluka: Labatsi ube nalo batawesekela ngekutsi: linani lebadlali labakuletheksthi lemukelekile, bane, kanye nelibutfo, lokungenteka lebantfu labambalwa.
(Naleminye imibono lenembako yemukelekile.)
Labatsi akanalo likhono batawesekela ngalokusetheksthini. (2)
- 17.3 NguSomhlolo. Uvetwa esetfulweni salomdlalo kute kuyewufika esiphetfweni sawo futsi nguye lobukene nenkinga/Nguye lokubukwe kutsi atfole sisombululo senkinga lekubukenwe nayo/Uvela kuto tonkhe tigemeko letikulomdlalo kusukela ekucaleni kuyewufika esiphetfweni sawo/Nguye loncobako esiphetfweni salomdlalo, njll.
(Naleminye imibono lenembako yemukelekile.) (2)
- 17.4 Kuvikela sive kutsi singahlaseleki lula/Kwetsembeka kuSomhlolo/Kucunga sibindzi aye kuMahubhulu umuntfu loyingoti nalonenhloko lecinile, njll.
(Naleminye imibono lenembako yemukelekile.) (Kubili kwaloku.) (2)
- 17.5 Lamavi aMahubhulu akahambisani nalokwenteka esiphetfweni ngobe esiphetfweni wehluleka kumelana nayo yonkhe imibuto labebutwa yona kodvwa wakhetsa kutibulala kunekuphendvula.
(Nalamanye emaphuzu lanembako emukelekile.) (2)
- 17.6 Imibono itawehluka ifake ekhatsi lokulandzelako: Timphi tibangela kungahlaliseki emimangweni yalomuhla, bantfu bayabaleka etindzaweni tabo bayewuhlala encenye lapho kuphephe khona nobe balahlekelane, kantsi embusweni waSomhlolo, bantfu bebahlalisekile njengobe abengatifuni timphi/Imibhikisho nayenteka emimangweni yalomuhla yenta kutsi babulalane kugcine kushona tihlobo, kantsi Somhlolo abengafuni kukhishwe umphefumulo/Emimangweni yalomuhla baphatsi abasahlonishwa, kantsi tindvuna taSomhlolo betihlonishwa, njll.
(Naleminye imibono lenembako yemukelekile.) (Kunye kwaloku.) (2)
- 17.7 Imibono itawehluka ifake ekhatsi loku: Bafundzi labanetinhloko letilukhuni labangafuni kulalela bafundzisi/Bafundzi labafaka umoya lomubi kulabanye bafundzi kutsi baphikisane nemitsetfo yesikolo/Bafundzi labanye bahlasela bafundzi betikolo letakhelene netabo/Bafundzi bakha emacembu langevani nalamanye etikolweni njengobe Mahubhulu abengafuni libutfo lakhe lente lokwentwa ngulamanye emabutfo, njll.
(Naleminye imibono lenembako yemukelekile.) (2)

- 17.8 Imibono itawehluka ifake ekhatsi loku lokulandzelako: Bekanenhloko lelukhuni/Besacondze kutsatsa nobe ngusiphi sigwebo senkhosi njengobe wagcina atibulele/Abecondze kuntjintja sincumo senkhosi netindvuna tayo. (Naleminye imibono lenembako yemukelekile.) (2)
- 17.9 Imibono itawehluka ifake ekhatsi loku: Wabona kutsi kuncono atibulale yena kunekutsi emele sigwebo saSomhlolo sekubulawa kabuhlungu nangabe inkhosi beyitawuncuma kumbulala/Abefuna kuphumelelisa emavi akhe latsi, 'Lami Lisiphetfo,' kunekutsi kuphetse emavi aSomhlolo/Abehlushwa ngulokuba nguvalakhe, angafuni kuboniswa, lokwamenta watsatsa sincumo sekutibulala. (Naleminye imibono lenembako yemukelekile.) (Kunye kwaloku.) (2)
- 17.10 Imibono itawehluka ifake ekhatsi loku lokulandzelako: Labatsi akahambisani batawesekela ngekutsi: Lamavi latsi, 'Lami Lisiphetfo,' akahambisani nebuloli baSomhlolo ahambisana naMahubhulu. Livi laSomhlolo belingesilo lekugcina abecale abonisane netindvuna takhe ngembikwekutsatsa sincumo/Abehola ngendlela yeMbuso wentsandvo yelinyenti, njll. (Naleminye imibono lenembako yemukelekile.) (Kunye kwaloku.) Labatsi siyahambisana, batawesekela ngalokusemdlalweni. (2)
- 17.11 Imibono itawehluka ifake ekhatsi loku lokulandzelako: Loku kwaba nemtselela ekudvungekeni kwelulwimi nemasiko nemihambo yeMaswati ngobe Somhlolo wagcina asateke Tsandzile Ndwandwe njengenina wesive/Wakhutsata kutekana kweMaswati naletinye tive/Wakhutsata kusebentisana emkhatsini wesive sakhe naletinye tive, njll. (Naleminye imibono lenembako yemukelekile.) (Kunye kwaloku.) (2)
- 17.12 Imibono itawehluka ifake ekhatsi loku lokulandzelako: Simo sembuso waSomhlolo besitawuchubeka sibe nekuthula. Somhlolo njengenkosi, abengeke avumele Mahubhulu abe nguvalakhe/Somhlolo abetawugcina amgwebile Mahubhulu lebekutamenta aphelelwe ngemandla nenhloko lelukhuni ngobe atawube sehlile esikhundleni/Bekungenteka Somhlolo amnike sigwebo sekubulawa lebekutawenta kube nekuthula, Mahubhulu asashonile, njll. (Naleminye imibono lenembako yemukelekile.) (Kubili kwaloku.) Labavumelana nalombono batawesekela ngalokusemdlalweni. (3)

[25]

SAMBA SESIGABA C: 25
SAMBA SAKO KONKHE: 80

SIGABA A: IRUBHRIKI YEKUHLOLA INDZATJANAMBHALO YENKONDLO [10 EMAMAKI]

Timpawu	Emalengiso	Licophelo lelisetulu	Lokwenetisako	Lokusilele	Lokungaphumelelisi
LOKUCUKETFEWE	5–6	4	3	2	0–1
Kuchazwa kwesihloko Kujula kwemibono, Kwesekela nekuvisiswa kwetheksth 7 EMAMAKI	-Sihloko sichazwe ngalokujulile -Luchungechunge lwemaphuzu lababatekako ekwesekela lacashunwe enkondlweni -Luhlobo lwembhalo kanye nenkondlo kuvisiswa ngemalengiso	-Sihloko sichazwe ngelicophelo lelisetulu kukhomba kusivisa -Emaphuzu ekwesekela ayevakala kodwa akaketfulwa ngendlela lelindzelekile -Luhlobo lwembhalo kanye nenkondlo kuvisiswa ngelicophelo lelisetulu	-Sihloko sichazwe ngalokwenetisako -Akhona lamanye emaphuzu lamahle lesesekela sihloko ngalokwenetisako -Leminye imibono yesekelwe kodwa esikhatsini lesinyenti bufakazi abukholweki -Luhlobo lwembhalo kanye nenkondlo kuvisiswa ngalokwenetisako	-Kuchazwa kwesihloko akwenetisi -Kulukhuni kutfolo emaphuzu lesekela sihloko -Luhlobo lwembhalo kanye nenkondlo akukavisiswa kahle	-Sihloko asikavisiswa nakancane -Akukho kucaphuna enkondlweni -Luhlobo lwembhalo kanye nenkondlo akukavisiswa nakancane
SAKHIWO NELULWIMI	4	3	2	1	0–1
Sakhiwo, Kuhleleka nekwetfula Kusetjentiswa kwelulwimi, umoya, nesitayela 3 EMAMAKI	-Sakhiwo lesibumbene ngemalengiso -Imibono yakhiwe yahleleka ngalokucace ngemalengiso -Lulwimi, umoya nesitayela kuvutsiwe futsi akunamaphutsa -Emaphutsa eluhlelo, sipelingi netimpawu tekufundza kuyindlala	-Sakhiwo lesicacile lesinemibono lehleleke ngelicophelo lelisetulu -Imibono letfuliwe iyalandzeleka -Kunemaphutsa lambalwa elulwimi, umoya nesitayela	-Bukhona bufakazi lobutsite besakhiwo -Kubumbana nekuhleleka kwemibono kuyenetisa -Lulwimi lunemaphutsa langasho lutfo; umoya nesitayela kuyenetisa	-Sakhiwo sikhomba emaphutsa ekuhleleka -Imibono ayikahleleki ngalokubumbene -Lulwimi lunemaphutsa lamanyenti -Umoya nesitayela akukemukeleki	-Sakhiwo lesingemukeleki nakancane -Imibono ihlangahlangene -Lulwimi lolunemaphutsa lamanyenti nesitayela lesingemukeleki -Umoya nesitayela akwemukeleki nakancane

SIGABA B NE–C: IRUBHRIKI YEKUHLOLA INDZABAMBHALO – YENOVELI NEMDLALO [25 EMAMAKI]

Timpawu	Emalengiso	Licophelo lelisetulu	Lokwenetisako	Lokusilele	Lokungaphumelelisi
LOKUCUKETFWE	12–15	9–11	6–8	4–5	0–3
Kuchazwa kwesihloko Kujula kwemibono, Kwesekelwa nekuvisiswa kwetheksthi 15 EMAMAKI	-Imphendvulo leneminingwane lengemalengiso lababatekako: 14–15 Imphendvulo leneminingwane lengemalengiso langababateki: 12–13 -Sihloko sichazwe ngalokujulile -Luchungechunge lwemaphuzu lababatekako ekwesekela lacashunwe etheksthini -Luhlobo lwembhalo kanye netheksthi kuvisiswe ngemalengiso	-Imphendvulo leneminingwane lesecophelweni lelisetulu -Sihloko sichazwe ngelicophelo lelisetulu kukhomba kusivisa -Lamanye emaphuzu ekwesekela ayevakala kodvwa akaketfulwa ngendlela lelindzelekile -Luhlobo lwembhalo kanye netheksthi kuvisiswa ngelicophelo lelisetulu	-Sihloko sichazwe ngalokwenetisako kodvwa akusito tonkhe tinhlangotsi leticikelelwe ngalokuphelele -Akhona lamanye emaphuzu lamahle lesesekela sihloko ngalokwenetisako -Lamanye emaphuzu esekelwe kodvwa esikhatsini lesinyenti bufakazi abukholweki -Kukhona lokusilele ekuvisiseni luhlobo lwembhalo kanye netheksthi	-Sihloko sichazwe ngekunyanyalata ngaphandle kweminingwane lesekelako -Ambalwa kakhulu emaphuzu lafanele kwesekela sihloko -Kuncane kakhulu kuvisiswa kweluhlobo lwembhalo netheksthi	-Kuncane kakhulu kuvisiswa kwesihloko -Mncane kakhulu umzamo wekuphendvula umbuto -Imibono ayikholweki -Luhlobo lwembhalo kanye netheksthi akukavisiswa nakancane
SAKHIWO NELULWIMI	8–10	6–7	4–5	2–3	0–1
Sakhiwo, Kuhleleka nekwetfula Kusetjentiswa kwelulwimi, umoya, nesitayela 10 EMAMAKI	-Sakhiwo lesibumbene -Singeniso nesiphetho lesingemalengiso -Imibono yakhiwe yahleleka ngemalengiso -Lulwimi, umoya nesitayela kuvutsiwe futsi akunamaphutsa	-Sakhiwo lesicacile lesinemibono lehleleke ngelicophelo lelisetulu -Singeniso nesiphetho kanye naletinye tindzima kuhleleke ngalokubumbene -Imibono ihleleke ngelicophelo lelisetulu -Kunemaphutsa lambalwa elulwimi, umoya nesitayela	-Bukhona bufakazi lobutsite besakhiwo -Kuhleleka nekubumbana -Kuhleleka nekubumbana kwemubono kuyenetisa kodvwa kunemaphutsa -Lulwimi lunemaphutsa lambalwa; umoya nesitayela kuyenetisa Kuhleleka kwetindzima kuyenetisa	-Sakhiwo sikhomba emaphutsa ekuhlela -Imibono ayikahleleki ngalokubumbene -Lulwimi lunemaphutsa lamanyenti -Umoya nesitayela akwemukeleki Kuhleleka kwetindzima kunemaphutsa	-Kungahleleki kahle kwesakhiwo kukhinyabeta kubumbana kwemibono -Emaphutsa elulwimi nesitayela lesingakemukeleki kwenta lombhalo ungabi yimphumelelo -Umoya nesitayela akwemukeleki -Tindzima tihlangahlangene
KWEHLUKA KWEMAMAKI	20–25	15–19	10–14	5–9	0–4